



Kangiani, Kalaallit Nunaatalu sineriaani meeqqat ikiorneqarnissaat tunngavigalugu Naalakkersuisut Danskít Naalagaffiannut ikioqqullutik saaffiginnissuteqassasut Naalakkersuisut peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Partii Naleraq, Demokraatit, Atassut, Suleqatigiisitsisut aamma Inuit Ataqatigiit) (Siullermeerneqarnera)

Nassuerutigisariaqarpara nuanniimmat alianarlunilu uagut partiit tallimat, sisamat atsiorlutik, uuminnga siunnersuuteqartariaqarsimagatta. Uanga isumaga naapertorlugu Naalakkersuisut namminneq qisuariartariaqarsimagaluarput Danmarkimiit ikiorneqarnissatsinnut, tamatta pilluta. Kisianni maanga killippugut taamannalu oqallisigisariaqarparput qanoq iliorluta una nunatsinni ajunaarnersuartut taasariaqartoq qanoq aqqiivigissanerlutigu. Tasiilaq kisimi pineqanngilaq nunarpulli tamarmi pineqarpoq, kikkulluunniit pissutsimik uuminnga ajorluinnaqqissaartumik eqqorneqarsimasut tamarmik tamatta pineqarpugut. Tamatta nassuerutigisariaqarparput ikiortariaqaratta.

Nunami tamakkerlugu ajunaarnersuuvoq. Ajorluinnarpoq nunatsinni meeqqat taama amerlatigisut sumiginnarneqarmata. Ajunaarnersuaq iluarsiviginiarlugu sunaagaluartorluunniit iliuuserisinnaasarput. Demokraatiniit isumarput naapertorlugu Danmarkimut assagut isaattariaqarpagut ikioqqulluta. Nalunngilarput siusinnerusukkut danskít naalagaaffiata ikiuunnissani neqeroorutiginiikuugaa, tamannalu qaqeqqittariaqarparput, sutigut ikiuinissamut periarfissaqarnersut.

Pingaaruteqarluinnarpoq nammineq suliniuteqarnissarput. Demokraatiniit isumarput naapertorlugu pingaarnertut anguniakkatta ilaat qasukkaallattariaqarpagut meeqqat sumiginnakkat ikiorniarlugit. Taamaattumik 2019-imi Aningaasaqarnikkut ingerlatsineq pillugu nalunaarut oqallisigigatsigu Naalakkersuisunut oqaatsikka uteqqissavakka. Issuaalaassaanga:

"Naalakkersuisup sulinermi ilanngaatt pillugu siunnersuut tusarniutigalugu



nassiuteqqammerpaat. Demokraatini pingaarnertut isumaqatigaarput sulinermut ilanngaat atulersinneqartariaqartoq, sulinissamut tamanna kajumissaataasussaammat. Siunnersuulli Naalakkersuisuneersoq pitsaavallaanngilaq aamma akileraariaatsitsinni akissarsiaqqortunermik aallaaveqarnissaq uangut iluarinngisarput ilanngunniarneqarpoq. Tamatuma saniatigut ilanngaat mikivallaarpoq aamma ukiuni ikippallaani atuuttussanngorlugu siunnersuutaavoq. Amerlanerpaat 300-400 koruunik amerlanerunngitsunik pissarsitinneqassapput qaammammut. Demokraatini isumaqarpugut siunnersuut taama angusaqarluarnianngitsigisumik saqqummiussineq kinguneqangaarnavianngitsoq. Taamaakkaluartorli siunnersuut ukiumut 50 millioner koruuninik aningaasartuutitaqartassaaq. Siunnersuut unitsiinnariartigu aningaasallu atorlugit meeqqanik sumiginnakkanik ikiuinissamut. Tamannali pissanngilaq inunnik isumaginninnikkut aqutsisoqarfimmik pilersitsinikkut imaluunniit arlaannik allaffissornermut pisariillisaataasussamik.

Naagga. Aningaasat atoriartigit meeqqat ornillugit. Qularnaariartigu meeqqap kialluunniit kanngutsaattuliorfigineqartup akunnerit 24 iluanni tarnip pissusaanut immikkut ilisimasalimmik oqaloqateqartalernissaa, pisortat ilisimasaqalerneranniit kanngutsaattuliorortoqarsimasoq. Immaqa oqarasuaatikkut oqaloqatigiinneq ingerlanneqarsinnaavoq? Immaqa oqalutseqarluni oqaloqatigiinneq ingerlanneqarsinnaavoq? Kisianni iliuseqannginnermiit tamanna pitsaanerussaaq? Neriuppunga isumassariarput ilassilluarneqarumaartoq. Allatut iliunngikkutta kanngunarpallaassaqaagut.

Taamaattumik; sulinermut ilanngaatip eqqunneqarnissaa pillugu siunnersuut ingerlaannaq tunuartinneqarli nassataanillu pingaarneruteriartigu meeqqat sumiginnakkat ikiorneqarnissaasa aningaasaliiffigineqarnissaa. Allamik pissuserissaarnerumik iliuusissaqanngilagut. Aamma neriuppunga sapinngisamik amerlanerpaat isuamaqataasinnaajumaartut. "

Siunnersuut taanna kisimi qanoq iliornissarput pillugu maannamut siunnersuutaagallarpoq, allangortitsiguli. Paaserusunnarpoq partiit allat tassani qanoq isumaqarnersut? Pingaarnerunerpa qaammammut 300-400 koruuninik



akileraarutitigut oqilisaanissaq? Tassa imaappoq ullormut 10 koruuninik amerlanerusunik aningaasaateqartoqartalissaaq. Demokraatiniit pingaernerutillugit meeqqat sumiginnakkat ikiornissaat.

Aamma erseqqissarusuppara Kalaallit Nunatsinni pissusilersuutigut ileqqugullu allanngortilluinnartariaqaratsigit. Matumani allatut ajornartumik ataatsimoorluinnartariaqarpugut nipituumillu NAAGGAARLUGU kinguaassiutitigut atonerluisarneq. Pisariaqarpoq kikkut tamarmik akisussaaffimmik tigusinissaat, angajoqqaat, ilaquuttat, qanigisat, meeqqeriviit, pisortat, tamatta ataatsimoorluta oqarlutalu TASSA. Kingunerluutit amerlavallaaqaat allaat inuup inuuneranik naleqartartut inuttut inuunermi ilaquttanullu kingornuteqattaarneqartarput. Taamaattumik tamatta pissusilersuutigut allanngortittariaqarpagut. Maannakkutut ingerlaannarsinnaangilagut, akissaqanngilagut amerlanerusut annaanissaannut, iliuuseqannginnissatsinnut akissaqanngilagut. Inuk erlinnarnerpaartaavoq tamanit, ataatsimoorniarta isummallu pigiliussat suugaluartulluunniit peerlutigit.

Ikiuineq Demokraatiniit ilaatigut kissaatigisarput tassaavoq sulisoqarnikkut ikiorneqarnissaq. Sulisooreersunuut ulapereeqisunut oqilisaasussanik inunnik isumaginninnermut siunnersortinik amingaateqartorujussuuvugut. Anguniakkagut angussagutsigit tamanna annertuumik iliuuseqarfigisariaqarparput. Tarnip pissusaanut immikkut ilisimasalinnik amingaateqarpugut, psykotepeutinik allanillu terapeutinik oqaloqatiginnittartussanik amerlasuutigut inunnut sakkortuumik misigisaqarsimasunut superviseriisartussanillu amingaateqarpugut.

Aammali ilinniarsimasunut superviseeriisinnaasunik amingaateqarpugut. Suliat imaannaangitsorpassuit ulluinnarni suliarisarpaat pisariaqartittarpaat aamma iliuuseqarnissaq. Inuit tarnikkut ikiueqqaarsinnaasut aamma pisariaqartippagut. Tassani danskit naalagaaffiat suleqatigisinnaavarput namminerlu piumassutsiminnik suliaqartartut ikiuutillugit - aaqqiissutissaq taanna tamatta iluaqutissarsivigisussaavarput. Innuttaasutut ikiuinissatsinnut sakkussanik amingaateqarpugut. Innuttaasut akuutilluinnarneqarnissaat uani pingaaruteqarluinnarpoq - tamanna pisariaqarpoq suliniutit sakkortusarumallugit



piffissaq sivikinnerusoq sivilunerusorlu isigalugit aaqqiissutissat angujumallugit. Isumaqarpunga Danmarkip neqeroorutigisimasaa oqaluuserissallugu qujaruttariaqaripput. Isumaqarpunga ataatsimoorluta oqaloqatigiittariaqartugut, danskit naalagaaffiat, Naalakkersuisut, Ilaqutariinnermut Peqqissutsimullu ataatsimiititaliaq, kommunit aamma ataatsimiititaliat susassaqtut, politiit, peqqinnissaqarfik, MIO aamma allat oqartussaaffiit kalluarneqtut pisariaqartinneqtut aaqqiissutissat nassaarisinnaajumallugit, oqaluinnaqinata avaqqutaareqinatalu. Nunaqartariaqarpugut nukittuumik, kisianni nuna nukittoq pilersissagutsigu pisariaqarpoq nukittuunik inuttaqarnissarput uangalu ilungersorusuppunga tamanna anguniarlugu.

Aamma oqartussaaffiit tigoriikkatta pitsaasumik ingerlalernissaanut ikiortissarsiorusuppunga. Nunatsinni politiit ulloq unnuarlu ulapittuarput - ukiup ulluini 365-ni - ikippallaarput stressilertarput qaavatigut ilungersorulupput - tassani angorusukkaluarpara danskit naalagaaffiata suliassamut kivitseqataanissaa. Naalagaaffimmi akisussaavoq tassunga. Politeqarfinni sulisut ullut tamarluinnaasa ilungersorput, taamaattumik angisuumik qujaffigerusuppakka, pisariaqartippaalli suliamik isumaginissaanut amerlanerusunik suleqateqarnissartik, taamaattumik aamma tassani ikiortariaqarpugut.

Aamma kissaatigigaluarpara naalagaaffiup nunatsinni mattussiviit misissussagai. Eqqortuusinnaangilaq "eqqartuunneqarnissamut" ukiut arlallit utaqqisoqartassasoq - ajorpoq. Aamma inatsisunik atortitsinerup iluani inatsisit sukateriffigeqataaffigisariaqarpai, kanngutsaattuliortartut, meeqqanut atonerluisartut, pinngitsaaliisartut il.il. eqqortumik eqqartuunneqarsinnaaqqullugit. Iliuserineqtut eqqortumik kinguneqartinneqartarnissaat pisariaqartipparput - eqqorneqtut naalliutsinneqartarmata.

Neriuppunga pineqartoq pillugu oqallinnerup kinguneranik inimi maani amerlanerpaat isumaqatigiissuteqarnerannik kinguneqarumaartoq taamassillutalu meeqqat inuusuttullu politikikkut iliuuseqarfissatut sallerpaangortillugit. Aamma taamaappoq kinguaassiutigut atonerluisarneq eqqarsaatigalugu, inuiaqatiginnimmi aserorterivoq. Nappaataavoq katsorsartariaqartoq. Piviusulersaarutip tullissaa utaqqisariaqangilarput eqeeriarluta ataatsimoorluta



aaqqisariaqarpugut....

Massakkut iliuuseqartariaqarpugut naak ippassaq
iliuuseqareersimasariaqaralualuta.

Pisariaqarporli imaannaanngitsunik aalajangiussinissarput. Pisariaqarpoq
immitsinnut nassuerutiginninnissaq. Pisariaqarpoq nammineq assatsinnut
Danmarkimut isaassissasugut, ikioqqulluta.

Taamatut oqaaseqarluta inassutigaarput siunnersuut akuerineqassasoq aamma
siunnersuut Ilaqutariinnermut Peqqissutsimullu Ataatsimiititaliamut
ingerlateqqipparput Aningaasaqarnermut Akileraartarnermullu Ataatsimiititaliap
tusarniaavigineqarnissaa pillugu, inatsinillu ataatsimiisitaliaq.